

दिनांक 05.04.2024

समय: 18.50 बजे

आकाशवाणी जयपुर—अजमेर

प्रादेशिक समाचार ।

- राज्य मांय चुनाव प्रचार जोर पकड़्यो—प्रधानमंत्री नरेन्द्र मोदी चूरु मांय चुनावी सभा कीनी—कांग्रेस रा अध्यक्ष मल्लिकार्जुन खड़गे रो काल जयपुर आवण रो कार्यक्रम ।
- लोकसभा चुनाव रा दूजा दौर मांय आज 13 संसदीय हलकां मांय नामपाना री जांच रो काम पूरो व्ह्यो ।
- प्रदेश मांय लोकसभा चुनाव रा पहला दौर मांय 12 संसदीय हलकां मांय बुजुर्गा अर दिव्यांग मतदातावां सारु घर ऊं वोट देवण रो सुबीतो आज सरु व्ह्यो ।
- राज्य मांय आज केई ठौड़ां तेज बायरा अर आंधी सागे हल्की बिरखा व्ही ।

000

लोकसभा चुनाव सारु वोट पडबा री तारीख नजदीक आवण सागे राज्य मांय ई प्रचार जोर पकडबा लाग्यो है । प्रधानमंत्री अर भाजपा रा आला नेता नरेंद्र मोदी आज दोपेरां पाछे चूरु मांय भाजपा रा उम्मीदवार री हिमायत मांय राख्यी ज्यी जनसभा ने सम्बोधित कीनी । वे कह्यो के पूरो देश विकसित बणबा रा संकल्प सागे काम कर रह्यो है । प्रधानमंत्री कह्यो के लारला दस साल मांय विकसित भारत री नींव तैयार करी ज्यी । वे कह्यो के दस साल पैली राज मांय आवण पछे वां री सरकार ईमानदारी ऊं काम कर रही है अर आज देश तेजी ऊं तरक्की कर रह्यो है । प्रधानमंत्री कह्यो के जनता री मकान, शौचालय अर पीवण रा पाणी सरीखी बुनियादी ज़रूरतां पूरी करण सारु वां री सरकार मिशन मोड मांय काम कीनो ।

.....
प्रधानमंत्री कह्यो के आवता बगत मांय देश मांय केई मोटा काम करना बाकी है अर देश ने घणो आगे ले जावणो है । वे कह्यो के राज्य मांय विधानसभा चुनाव री बगत जो वायदा करी ज्या, वां ने पूरा करण माथे काम सरु व्हे ग्यो है । प्रधानमंत्री कह्यो के भाजपा ऐलाण नी करे है, बल्कि संकल्प लेवे है । वे कह्यो के साल 2019 मांय जो संकल्प पत्र जारी करी ज्यो हो, वां रा घणखर संकल्प वायदा पूरा कर दिया ज्या है । वे विपख री पार्टियां री आलोचना करता थकां कह्यो के फौज जद एयरस्ट्राइक अर सर्जिकल स्ट्राइक कीनी तो विपख री पार्टियां सबूत मांग रही ही । प्रधानमंत्री कह्यो के मौजूदा विपख री पार्टियां जब ताई राज कीनो, वे फौज रा हाथ बांध र राख्या, पण अब फौज ने पलटवार करण री खुली छूट है । प्रधानमंत्री कह्यो के विपख री पार्टियां भ्रष्टाचार करण वाळां ने बचावण मांय लाग्योडा है, पण भ्रष्टाचार करण वाळां रे खिलाफ कार्रवाई चालती रेहवेला । प्रधानमंत्री रो काल अजमेर कने पुष्कर मांय अजमेर अर नागौर संसदीय हलका ऊं भारतीय जनता पार्टी रा उम्मीदवारां री हिमायत मांय राख्यी जावण वाळी सभा ने संबोधित करण , ब्रह्मा मंदिर मांय दर्शन अर पुष्कर सरोवर री पूजा—अर्चना रो कार्यक्रम है । भाजपा रा केई आला नेता ई न्यारी—न्यारी ठौड़ां प्रचार कीनो । मुख्यमंत्री भजन लाल शर्मा सीकर जिला मांय पार्टी रा

उम्मीदवार री हिमायत मांय राख्थी ज्यी जनसभा ने सम्बोधित कीनी। उप मुख्यमंत्री दीया कुमारी ई चित्तौडगढ मांय जनसभा ने सम्बोधित कीनी।

भाजपा रा राजस्थान रा चुनाव प्रभारी डॉ. विनय सहस्रबुद्धे बांसवाड़ा मांय पार्टी रा ओहदादारां री मीटिंग लीनी। कांग्रेस री ओर ऊं पार्टी रा प्रदेश अध्यक्ष गोविन्द सिंह डोटासरा अर दूजा नेता जनसभावां ने सम्बोधित कीनी। कांग्रेस रा राष्ट्रीय अध्यक्ष मल्लिकार्जुन खड़गे, पैली वाळा अध्यक्ष सोनिया गांधी अर राहुल गांधी समेत पार्टी रा न्यारा-न्यारा नेतावां रो काल जयपुर मांय सभा करण रो कार्यक्रम है।

000

लोकसभा चुनाव रा दूजा दौर सारू उम्मीदवारां कानी ऊं दाखिल करी ज्या नामपाना री जांच करी ज्यी। उम्मीदवार 8 अप्रैल ताई नाम पाछा ले सकेला। ई पाछे चुनाव रा दूजा दौर मांय उम्मीदवारां री तादाद री जाणकारी मिल सकेला। चुनाव रा पैला दौर सारू 114 उम्मीदवार मैदान मांय है।

0000

स्वीप

लोकसभा चुनाव मांय वोट देवण वाळां री बत्ती ऊं बत्ती भागीदारी तैय करण रा मकसद ऊं राज्यमांय भांत-भांत रा कार्यक्रम राख्या जा रह्या है। सवाईमाधोपुर जिला रा हिन्दूपुरा अर जटावती गांवां मांय केंद्रीय संचार ब्यूरो री ओर ऊं आज चित्र प्रदर्शनी लगायी ज्यी अर संगोष्ठी राख र वोट देवण रो महत्त्व समझाई ज्यो। कार्यक्रम मांय मौजूद लोगां ने वोट जरूर देवण री सौगंध दिरायी ज्यी। बून्दी मांय जिला कलक्ट्रेट रा अहलकारां अर कर्मचारियां री ओर ऊं मतदाता जागरूकता रैली निकाली ज्यी। झुंजरपुर मांय आंगनबाडी कार्यकर्ता अर आशा सहयोगिनियां जागरूकता रैली निकाल र वोट जरूर देवण री अपील करी ज्यी। पाली जिला रा खिंवाड़ा मांय स्वीप कार्यक्रम रा तहत मनरेगा मजूरां ने वोट जरूर देवण री सौगंध दिरायी ज्यी। उदयपुर रा पशुपालन प्रशिक्षण संस्थान मांय अहलकार अर विद्यार्थी रंगोली बणा र वोट जरूर देवण री अपील कीनी। झुंझुनूं रा चिड़ावा मांय वोट बारात निकाली ज्यी। इण मांय पहली दफा वोट देवण वाळां ने बीद बणायी ज्या।

000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। सांचौर रा खेताराम मेघवाल एक नारो **घर का कार्य प्रतिदिन, वोट का अवसर एक दिन** भेज र सगळा ऊं वोट जरूर दे र लोकतंत्र रो उत्सव मनावण री अरज कीनी है।

000

राज्य मांय लोकसभा चुनाव रा पैला दौर मांय वोट पडबा वाळा 12 संसदीय हलकां मांय 85 साल या बत्ती उम्र रा बुजुर्ग अर दिव्यांग मतदातावां सारू घर ऊं वोट देवण रो सुबीतो आज सरू व्ह्यो। लोकसभा चुनाव रा पैला दौर मांय घर ऊं वोट देवण रा पात्र 27 हजार ऊं बत्ता बुजुर्ग नाम मण्डाया है। आज झुंझुनूं मांय गुढा मोड़ रा 104 साल रा बुजुर्ग अब्दुल अजीज घर ऊं वोट दे र प्रशासन रो शुक्रिया अदा कीनो। जयपुर रा बनीपार्क हलका रा रहवासी पैली वाळा जज वी.एस. दवे ई घर ऊं वोट दीनो। वे ओ सुबीतो मुहैया करावण सारू निर्वाचन आयोग रो आभार जतायो। श्री दवे सगळा पात्र मतदातावां ऊं वोट जरूर देवण री अपील कीनी।

बीकानेर मांय 92 साल री फातमा घर ऊं वोट दीनो अर निर्वाचन आयोग री ई व्यवस्था री सराहवणा कीनी। बीकानेर मांय ई 90 साल रा साहित्यकार डॉ. मदन केवलिया वां रा रहवास माथे वोट दीनो। डॉ. केवलिया कह्यो के वे साल 1957 ऊं लगातार वोट दे रह्या है। हनुमानगढ मांय दुर्गा कॉलोनी री 87 साल री किशना जी अर बाबा श्याम कॉलोनी रा 24 साल रा दिव्यांग मतदाता जगदीप सिंह ई उमाव सागे घर ऊं वोट दीना। करौली-धौलपुर लोकसभा हलका रा कुड़गांव मांय ई 85 साल री महिला मतदाता घर ऊं वोट दीनो।

बीकानेर रा बिन्नाणी चौक री रहवासी चालीस साल री दिव्यांग मतदाता अखिया कह्यो के मतदान केन्द्र जा र वोट देवण मांय घणी परेशानी आती ही, पण अब घर ऊं ई वोट दे र वां ने चोखो लाग रह्यो है।

000

आकाशवाणी समाचार जयपुर री ओर ऊं समाचार बुलेटिनां मांय न्यारा-न्यारा लोकसभा चुनाव हलकां रा बारा मांय जाणकारी दी जा रही है। आज पेश है नागौर सीट रो हाल-प्रदेश री 25 लोकसभा सीटां मांय ऊं नागौर सीट माथे सगळां री निजर है। अठे रा दो खास उम्मीदवार पार्टी बदल र चुणाव मैदान मांय है। और ब्यौरो म्हाणा खबरनवीस ऊं-

000

राज्य मांय आज केई ठौड़ां तेज बायरो बाजण अर आंधी चालण सागे हल्की बिरखा व्ही। टोंक मांय दोपहरां पाछे हल्की बारिश व्ही। सवाई माधोपुर मांय ई तेज हवा चालण अर हल्की बिरखा व्हेवण ऊं गर्मी रो असर थोड़ो कम पड़्यो। झालावाड जिला मांय दोपहरां पाछे बादळा मण्ड जावण ऊं गर्मी ऊं साता मिली। बारां मांय ई बादळ व्हेवण ऊं गर्मी रो असर थोड़ो कम व्ह्यो। जयपुर, दौसा, झुंझुनू, सीकर, नागौर अर भीलवाडा जिलां मांय ई कठे कठे तेज बायरा सागे हल्की बिरखा रा समाचार है। मौसम विभाग रे मुजब काल ई भरतपुर अर कोटा संभाग मांय कठे कठे हल्की बिरखा व्हेवण रा आसार है। महकमो काल केई ठौड़ां बीजळी पड़बा सारू चेतायो है। ई बीचे लारला 24 घंटा मांय घणखर ठौड़ां अधिकतम तापमान 35 ऊं 38 डिग्री सेल्सियस बीचे दर्ज करी ज्यो, जद के कम ती कम तापमान ई 22 डिग्री सेल्सियस ऊं ऊंचो दर्ज करी ज्यो।

000

कांग्रेस पार्टी रा अध्यक्ष मल्लिकार्जुन खड़गे अर पैली वाळा अध्यक्ष सोनिया गांधी अर राहुल गांधी आज नई दिल्ली मांय लोकसभा चुनाव सारू घोषणा-पत्र जारी कीनो। इण मांय रोजीना कम ती कम चार सौ रूप्या री मजूरी री गारंटी, हर गरीब पिरवार ने हर साल एक लाख रूप्या देवण, केन्द्र सरकार री नौकरियां मांय महिलावां सारू पचास फीसदी आरक्षण, सरकारी मोल माथे साखां री खरीदी री कानूनी गारंटी अर राष्ट्रीय स्तर माथे जाति आधारित जनगणना सरीखा वायदा करी ज्या है।

कांग्रेस वां रा घोषणा-पत्र मांय आवता दस साल मांय 23 करोड लोगां री जिन्दगी मांय सुधार ला र गरीबी खत्म करण रो ई वायदो कीनो है। ई मौके पार्टी रा अध्यक्ष

मल्लिकार्जुन खड़गे कह्यो के वां री पार्टी रो घोषणा पत्र न्याय रा पांच खम्भां नौजवान, महिलावां, किसान, मजूर अर आबादी प्रतिशत रे मुजब मौका देवण माथे आधारित है। कांग्रेस रा घोषणा पत्र माथे प्रतिक्रिया देता थकां भाजपा रा प्रदेश अध्यक्ष सीपी जोशी इण ने झूठ रो पुलिन्दा बतायो।